

# «Observar il martgà da lavur che sa mida»

Pled d'avertura da la presidenta dal parlament Elita Florin-Caluori

■ **(anr/fa) Las pli bleras plazzas da lavur en Grischun porscha l'hotellaria e las segund bleras il sector da construcziun, omadus secturs èn actualmain sut squitsch. Tar sias decisiuns duess la politica a l'avis dad Elita Florin-Caluori resguardar questa situaziun.** En ses onn presidial sa deditgescha la presidenta dal cussegl grond *Elita Florin-Caluori* (pcd, Razén) al tema «uman e lavur». Quai ha ella fatg er en ses pled d'avertura per la sessiun d'atun che ha cumenzà ier. «Jau vuless render conscient al public tant l'importanza da la lavur sco chausa che collia la societad sco er a la responsabladad da la politica da crear bunas cundiziuns generalas per las plazzas da lavur», ha ella ditg. A ses avis duess esser l'engaschament sin plaun politic a favur da la lavur e per cundiziuns da lavur gistas «ina finamira politica prioritaria, e quai sin tut ils stgalims statals».

## «Dar atenziun a las plazzas da lavur»

La presidenta dal parlament grischun ha menziunà il martgà da lavur che sa mida: «Quel sa mida pli e pli fitg ad in'economia che sa basa sin la savida.» Las barrieras per persunas main qualifitgadas daventan tenor ella uschia pli autas. Sco ulteriuras tendenzas ch'ins observa actualmain en Svizra ha ella numnà l'integraziun dad adina pli bleras mammas en la lavur, il cumenzament pli difficil per ils giuvenils en la vita professiunala, las consequenzas da la libra circulaziun da persunas e l'exclusiun da persunas che

nun èn cumplainmain ablas da lavurar. «Tut questas tendenzas produceschan novs ristgs ed han per consequenza perdents e victurs», ha punctuà Elita Florin-Caluori, «perquai sun jau persvadida che nus parlamentarias e parlamentarischuns faschain bain da deditgar nossa pli gronda atenziun a la lavur ed a las plazzas da lavur.»

## Betg mo il turissem fa quitads

Datas actualas davart il svilup da l'activitad da gudogn mussan che quella è creschida per l'onn 2011 en il Grischun per 1,5 pertschient, la media svizra era 2,2 pertschient. «Nus nun essan mo dependents d'ina «economia orientada a l'export, da la quala fa part er il turissem,

nus duvrain era in'economia grischuna interna ch'è cumpetitiva ed effizienta.» Var 14 pertschient da las plazzas da lavur grischunas èn en il sector d'hotellaria, «quai è bainquant dapli che en auters chantuns». Las segund bleras plazzas da lavur porscha cun var 12 pertschient il sector da construcziun: Il zenit è qua cuntanschi. Circa a partir da

l'onn 2014 fan ins sco ch'ella ha ditg quint ch'ins badia en Grischun las consequenzas da l'iniziativa cunter las segundas abitaziuns.

## «Bainspert mancanza da forzas da lavur»

Las prognosas las pli actualas prevesan per ils onns 2012 e 2013 baingea anc in pitschen augment da l'economia grischuna. «Tuttina è la situaziun en noss chantun inquietanta», ha avertì la presidenta dal cussegl grond. In problem pli grond sa mussa tenor ella tar la mancanza da forzas da lavur: «Sche noss giuvenils bain scolads bandunan il chantun e na turnan pli è quai ina perdita per il Grischun che nus pudain frenar mo cun dar uschè blera atenziun sco pussaivel a la furmaziun professiunala.» In ulteriur problem è tenor ella la populaziun che vegn adina pli veglia ed il dumber da naschientschas che sa reducescha. Questa problematica vegn sco ch'ella ha ditg en ils proxims onns anc pli acuta: «La politica da furmaziun sto perquai vegnir colliada pli e pli fitg cun la politica economica e cun la promoziun da l'economia», è ella da l'opiniun. Elita Florin-Caluori ha appellà a las parlamentarias ed als parlamentarischuns da giuditgar mintga nova missiva sut l'aspect da la situaziun da las plazzas da lavur: «Avant che decider stuessan nus ans dumandar tge consequenzas che las decisiuns hajan per las plazzas e las forzas da lavur en Grischun?»



L'uman e la lavur è stà il tema dal pled d'avertura da la presidenta dal cussegl grond Elita Florin-Caluori.

FOTO Y. BÜRKL